

( lire à 50 exemplaires. )


1047

N. Genisot

**NOELZ.**

Ye (Reserve)

3812



# NOELZ

PAR LE CONTE D'ALSINOYS.



**AUTRES NOELZ**

SUR LES CHANTS

DE PLUSIEURS BELLES CHANSONS.



ON LES VEND

AU MANS, CHEZ A. LANIER,  
IMPRIMEUR-LIBRAIRE.

1847

**1848**

*Tiré à 50 exemplaires.*

N°.

LES NOELZ que nous offrons aujourd'hui aux amateurs de notre vieille littérature, sont l'œuvre de NICOLAS DENISOT. Ce poète, qui fut au XVI<sup>e</sup> siècle, une des gloires de la province du Maine, s'est caché ici, comme dans la plupart de ses autres ouvrages, sous le pseudonyme diaphane de CONTE D'ALSINOYS. Denisot profita d'une rencontre fortuite d'Anagramme, pour se créer un comté tout

imaginaire et suivit cette mode puérile, fort répandue alors, de déguiser son véritable nom dans les replis d'un nom transposé. Daurat avait, des premiers, fait connaître dans notre langue l'Anagramme tombée aujourd'hui en désuétude, après avoir été illustrée par François Rabelais, Etienne Tabourot, Noël du Fail, Guillaume des Autelz, Hierosme d'Avost, et bien d'autres. L'Anagramme, il y a de cela une centaine d'années, disparut écrasée sous cette épigramme adressée par le bon Guillaume Colletet à Gilles Menage :

J'aime mieux sans comparaison,  
 Menage, tirer à la rame,  
 Que d'aller chercher la raison  
 Dans les replis d'un Anagramme.  
 Cet exercice monacal  
 Ne trouve son point vertical  
 Que dans une tête blessée,  
 Et, sur Parnasse, nous tenons

Que tous ces renverseurs de noms,  
Ont la cervelle renversée.

Les NOELZ de Denisot sont, il faut l'avouer, parfois obscurs, mais ils présentent çà et là quelques traits heureux, quelques touches vives ou naïves, qui font que ces petits poèmes sont loin d'être dénués d'un certain charme. Ils furent, au reste, fort goûtés à l'époque où ils parurent, et nul autre recueil de cantiques sacrés n'obtint, que nous sachions, un succès semblable. Il est presque impossible de trouver aujourd'hui des exemplaires bien conservés de l'édition originale : c'est tout au plus s'il est permis de dire, avec vérité :

Il en est jusqu'à trois, que je pourrais citer !

Nous pensons donc que cette réimpression, faite avec un soin excessif, sera favorablement reçue et prendra place dans

les cabinets des bibliophiles à côté des livrets du même genre mis au jour précédemment. Nous avons, afin de rendre notre publication plus ample et surtout plus intéressante, réimprimé à la suite des cantiques du Conte d'ALSINOYS, d'autres NOELZ SUR LES CHANTS DE PLUSIEURS BELLES CHANSONS NOUVELLES. Ces dernières pièces sont également d'une extrême rareté, et nous ont paru mériter pareillement l'attention. Si notre espoir n'est pas trompé, si les amateurs daignent prendre en gré cette curiosité bibliographique, nous leur offrirons certainement plus tard diverses autres petites pièces *rarissimes*, conservées en éditions anciennes, dans la bibliothèque du Mans.

A. L.

Octobre 1847.

# NOELZ

PAR LE CONTE D'ALSINOYS.

PRESENTEZ

A MADEMOISELLE SA VALENTINE.

S'ENSUYT

LE NOM DES CHANSONS.

NOELZ SUR :

○ combien est heureuse.

Mon Pere aussi ma mere.

Les Bouffons.

( N'est-il pas bien ayse le pauvre Briandois. )

Et tent plus ie luy disoye que sa Commere i'estoye.

Dame scauriez vous congnoistre que ce peult estre.

Je porteray les blanches patenostres.

Comment il m'y faut vng seruant.

Amy ie ne veulx plus aymer.

Je suis grise voirement.

## DIZAIN AU DETRACTEUR

PAR LE CONTE D'ALSINOYS.

A ma tres belle et gente Valentine ,  
Et non a aultre , ay fait ce peu d'ouvrage ;  
Tu me diras ( ô langue serpentine )  
Ce sont Noelz et Chants pour tout potage :  
Je le veulx bien , mais c'est bien davantage ,  
Car en cela JESY CHRIST est loué  
Et celle la , aussi m'a aduoué  
(En les chantant de sa voix argentine)  
Celle a qui suis , du tout en tout voué ,  
C'est ma tres belle et gente Valentine.

## CHANSON DE NOEL

SUR LE CHANT DE :

**O** combien est heureuse  
La peine de celer  
Une flamme amoureuse  
Qui faict deux cueurs brusler  
Dont chascun d'eulx s'attend  
Estre bien tost content.

ARGUMENT SUR L'EUANGILLE

*Missus est Angelus.*      *Luc. j.*

**O** Combien fut heureuse  
La vierge quand receut  
Ceste voix amoureuse  
Dont tost apres conceut  
Par oeuvre supernel  
Le filz de l'Eternel.

La puissance ineffable  
A monsté par effect  
Vng mystere admirable

Quant vng corps a parfaict  
Parfaict en Deité,  
Prenant humanité.

La pucelle excellente  
En ses flancs precieux  
Celuy qui la regente  
En terre et mer et cieulx  
Et sur tout element  
La porte humainement.

Doncques Marie est faicte  
Mere de Christ vray Dieu  
Et la loy est refaicte  
Ou rigueur n'a plus lieu ;  
Grace par ses efforts  
La poulse et met de hors.

L'Ange de hault parage  
Ayant auctorité  
Luy a faict le message  
Et luy a recité :  
Ce mot tant gracieux :  
Aue, Royne des Cieulx.

Aue, seulle outrepasse

En generation  
Pleine de toute grace  
Ayant perfection  
Dieu le veult reseruer  
Et pour bien conseruer.

Luy hault seigneur et maistre  
Qui contient tout en soy  
Ta veue tant adextre  
Qui est espris de toy  
De toy prend vng baiser  
Se voulant appaiser.

Tu es la plus heureuse  
Qui fut onc et sera :  
Tu es fleur precieuse  
Dont vng fruit sortira  
Maulgré l'aer vicieux  
Fruict sur tous precieux.

La vierge humble et benigne  
Fut pensieue pour lors  
Et s'estimant indigne  
Fut troublée en son corps  
Ayant sans fiction  
Modeste affection.

Ne doute point Marie  
Mais estime combien  
Dieu qui tout seigneurie  
Te veult faire de bien :  
Car tu as aujourd'huy  
Grace trouuée en luy.

Tu as donc troué grace  
Grace en don gracieux  
En ceste terre basse  
Procedante des Cieulx  
Et vient du Createur  
Sur tout dominateur.

Ta grace est souueraine  
Ayant tousiours vigueur :  
Ta grace est la fontaine  
Dont procede liqueur :  
De goust tres sauoureux  
Dieu en est amoureux.

Vela et sans demeure  
Maintenant concepueras  
Au temps prefix et heure,  
Vierge l'enfenteras :

Jesus sera nommé  
De Dieu bien aymé.

Il aura la puissance  
De Daud son affin  
Et tousiours ioysance  
De son regne sans fin :  
C'est eternellement  
Lassus au firmament.

Comment ce peult faire  
Puisque homme n'ay cogneu  
Et que i'entends parfaire  
Du tout en tout mon veu ,  
Et en integrité  
Garder Virginité?

Si doncques ie suis forte ,  
Et maintiens ce vouloir  
Dy moy en quelle sorte  
Je pourray concepuoir  
Et comment ce sera  
Que cela se fera ?

L'esprit saint immuable

Nicndra par dessus toy



Par mystere admirable,  
Ainsi oultre la loy  
Sera par toy receu  
Du saint esprit conceu.

Doncques Marie estime  
Non par commixtion,  
Mais par presence intime  
Ceste incarnation :  
Filz de toy sera faict  
Enfant beau et parfaict.

Tu luy es preparée  
Habitable aujourdhuy  
Et seras obumbrée  
Par la vertu de luy :  
Telle est sa volonté  
Sa puissance et bonté.

Doncques Vierge amyable  
Le fruit qui prouindra  
De toy tant acceptable  
Vng chacun le tiendra  
Tousiours et en tout lieu  
Le filz aymé de Dieu.

Et mesmes ta parente  
Ainsi que tu as sceu  
En vieillesse apparente  
Vng Enfant a conceu,  
Sterille fut deuant ;  
Foecunde est maintenant.

Son dire est infaillible  
Car tout soudain est faict  
Et rien n'est impossible  
Enuers luy seul parfaict :  
Entends Marie et croy  
Ce qu'il te dit par moy.

Ceste oraison parfaicte,  
Marie respondit :  
Sa volunte soit faicte  
Ainsi que tu m'as dit :  
Serue suis et seray,  
De luy tant que viuray.

Lors el fut obumbrée  
Par admiration :  
En elle tant aymée  
Print incarnation ,  
Jesus puissant et fort

Nostre seul reconfort.

Comme de sa nature  
Le soleil au matin  
Perce sans ouverture  
Le voirre cristalin  
Et ne sent fraction  
Aulcune ou lesion ;

Tout ainsi le verbe entre  
Tant precieux et cher  
Dedans le sacré ventre  
Et soudain est fait chair :  
Nous l'auons trestous veu  
Et sa gloire cogneu.

Ceste lumiere monde  
Et vraye a esclarcy  
Tout homme de ce monde  
Par vil peché noirey  
Et de ses rayons fors  
Met toute nuyct dehors.

O plus que heureuse mere  
A l'heure que tu veis  
La puissance du pere

La puissance du fils  
L'ardeur du saint Esprit  
Lors quel fut ton esprit ?

AMEN.

## CHANSON DE NOEL

SUR

Mon pere aussi ma mere  
M'ont laisse sans amy :  
De ma volonte seule.

ARGUMENT SUR LE CANTIQUE DE

La Vierge : Magnificat. Luc. j.

**R**euille toy fidelle,  
Chante vers gracieux  
Composez par la belle  
Mere du roy des Cieulx ;

Ceste vierge benigne  
Doulcement les chanta,  
Quant sa chere cousine  
Seullette visita.

A chanter nous convie  
Et resiouyr aussi  
Quant d'esprit fut ravie

Chantant ces mots ainsi :

Mon ame magnifie  
Le seigneur tout puissant  
Et en luy seul se fie  
Dont tout bien est yssant.

Par sa bonne assurance  
Mon esprit tout en soy  
A eu reiouyssance  
En dieu salut de moy.

Sur son humble servante  
A iecté ses deux yeulx  
Dont toute ame viuante  
Me benist en tous lieux.

Si grace incomparable  
M'a fait vng tres grant bien  
Son saint nom faorable  
A tousiours sera mien :

Et la misericorde  
Et pitié d'iceluy  
Humainement s'acorde  
Vers tous craintifz de luy.

Vertu et force est mise  
Sur son bras merueilleux  
Pour rompre l'entreprise  
De tout homme orgueilleux.

Le fol a faict descendre  
Du lieu de dignité  
Et a l'humble a faict prendre  
Le lieu d'auctorité.

A l'affligé sans cesse  
Donne biens plantureux  
Et oste la richesse  
Au riche malheureux.

Records de sa clemence  
Israel a receu  
Son Enfant d'excellence  
Qui par grace est conceu.

Ainsi fut sa promesse  
Au grand pere Abraham  
Et a tous siens sans cesse  
Jusques au dernier an.

AMEN.

## CHANSON DE NOEL

### SUR LE CHANT DES BOUFFONS.

Ne pensez pas vous aultres  
Amoureux que comme vous  
De soy langoureux  
Car ie suis plus ayse  
La veoir restouyr  
Qu quant ie la baise  
Que vous de iouyr.

N'es tu pas bien ayse  
N' Peuple d'Israel,  
Jesu Christ te baise  
Chante donc Noel.

Misericorde  
Auecques Verité  
Paix et Concorde  
Ont faict solemnité  
D'ung diuin mistere  
Qui veult appaiser  
L'erréur du grand pere

Par vng doux baiser.

Le fils de Dieu  
Personne en trinité  
Vient en ce lieu  
Pour prendre humanité,  
Parquoy il fault croire  
Croire entierement  
Que c'est nostre gloire  
Nostre saulueement.

Amour luy faict  
Mesler diuinité  
Pour le forfait  
De nostre iniquité :  
Nature en souffrance  
Prends contentement,  
Tu as deliurance  
De ton grief tourment.

Le Paranimphe  
A desia visité  
La belle nimphe  
Et luy a recité :  
Aue, gracieuse  
Fille du grand roy,

Sur toutes heureuse  
Car dieu est en toy :

En toy celuy  
Prend incarnation  
Qui tient en luy  
Toute perfection :  
C'est le roy de gloire  
Qui veult triompher  
Et auoir victoire  
Du maling d'enfer.

Bien cinq mil ans  
Peres ont attendu  
Et languissantz  
Le bien ont pretendu  
Qui vient aparoistre  
Ce iour de Noel :  
Car le Christ veult naistre  
D'ung corps virginel.

Droit a mysnuict  
La vierge a enfanté ;  
Toute la nuict  
Les anges ont chanté :  
Gloire supernelle

Soit aux cieulx luyantz ;  
Paix vniuerselle  
Soit a tous venants.

Puis du hault lieu  
Par l'eternel edit  
Tout au meilleu  
L'Ange vient et leur dit :  
Laissez brebis paistre,  
Voyez l'Enfant beau  
Le seigneur et maistre  
De vostre troupeau.

Car ie vous dy,  
Vostre pasteur est nay  
C'est aujourd'huy  
Qu'ung filz vous est donné ;  
C'est le vray messie  
Roy du firmament  
Dont la prophetie  
Chante plainement.

Pasteurs gentilz ,  
Prenez tous reconfort ,  
Grandz et petitz  
Mettez vous en effort

De chansons rustiques  
Dont estes scauantz  
Ou quelques cantiques  
Mettez en auant.

Toute victoire  
Est en son bras puissant  
Et si a gloire  
Sur le loup rauissant :  
Donc bergeres franches  
De lauriers tous verds  
Portez luy des branches  
Pour aorner son bers.

Sur cet instant,  
Les pasteurs ont veillé  
Joyusement  
Sans avoir sommeillé  
Dedans la prayrie  
Pres de leurs aigneaux  
Menans rusterie  
Chantant chantz nouueaux.

D'une violle  
Oyant douce chanson  
Je m'en rigolle

En approchant au son,  
Dessous ung grant chesne  
Jaquette en iouoit  
Et pres d'ung beau fresne  
Janneton dançoit.

Perrot s'en vint  
A nous de cueur ioyeux  
Et luy souuint  
De l'Ange gracieux :  
Voyons la commere  
C'est bien la raison  
Faisons lui priere  
De douce oraison.

Chascun s'esbat  
Par curiosité,  
Faire ung sabat  
Et par ioyuseté :  
Voicy dist Eustace  
De la venaison  
Qu'ay pris à la chasse  
Pour ma garnison.

Marchons le pas :  
C'est par trop arresté

Tout nostre cas  
Est tant bien apresté :  
Dy moy, goulle noire ,  
Viendras tu o nous  
Pour nous faire boire .  
Et enyurer tous ?

Voicy le lieu  
Le lieu bien reluisant  
Ou nostre Dieu  
Est sur le foing gisant :  
O grande lumiere  
Oeuure supernel,  
Verite entiere  
Du Dieu eternel.

Voicy trois Roys  
En habitz sumptueux  
Par grand arroys  
Venus de diuers lieux  
Ont faict diligence  
De leurs beaux présentz  
Faire obéissance  
D'Or, Myrrhe, et Encens.

Nous le prirons

Selon nostre debvoir  
Et supplirons  
Qu'ung iour nous puissions veoir  
Sa gloire infinie  
Au trosne des cieulx  
Après ceste vie  
Des terres tres lieux.

AMEM.

## CHANSON DE NOEL

SUR

Et tant plus ie luy disoye  
Que sa commere i'estoye  
Et tant plus tant plus. etc.

Celuy qui a tout effect, (Bis.)  
Et qui tout de rien a faict (Bis.)  
En Marie a couerture  
En elle prend nourriture  
Luy qui est surtout parfaict  
Nous est frere par nature  
Luy qui est surtout parfaict  
En Marie est homme faict.  
Et tant plus tant plus tant plus  
Nous implorerons sa grace  
Et tant plus tant plus tant plus  
Grace aurons et du surplus.

C'est vng corps substancier (Bis.)  
Qui est descendu du ciel (Bis.)  
En vng vaisseau d'excellence

Pour amortir ignorance  
 Par le dit de l'Eternel  
 Et nous donner assurance  
 Par le dit de l'Eternel  
 A ce saint iour de Noel.  
 Et tant plus tant plus tant plus  
 Nous implorerons sa grace  
 Dont tant plus tant plus tant plus  
 Grace aurons et du surplus.

Selon qu'il fut decreté (Bis.)  
 En la sainte Trinité (Bis.)  
 Au iour dict fut apperceue  
 Marie seulle receue  
 Pour conioindre humanité  
 Du consolateur yssue  
 Pour conioindre humanité  
 Avec la Divinité.  
 Dont tant plus tant plus tant plus  
 Nous implorerons sa grace  
 Et tant plus tant plus tant plus  
 Grace aurons et du surplus.

C'est nostre saluation (Bis.)  
 Et nostre redemption (Bis.)  
 Car l'Ange du hault empire

A Marie a voulu dire  
 Du seigneur l'affection  
 Voulant nature reduyre  
 Du seigneur l'affection  
 Prenant Incarnation.  
 Dont tant plus tant plus tant plus  
 Nous implorerons sa grace  
 Et tant plus tant plus tant plus  
 Grace aurons et du surplus.

Sans feu, sans lict, sans drapeaulx (Bis.)  
 Entre les deux animaulx (Bis.)  
 A minuyt Jesus enfante :  
 L'Ange du ciel en l'aer chante  
 Et l'annonce aux pastoureaulx  
 En ceste nuyt reluysante  
 Et l'annonce aux pastoureaulx  
 Gardans brebis et aigneaulx.  
 Dont tant plus tant plus tant plus  
 Nous implorerons sa grace  
 Et tant plus tant plus tant plus  
 Grace aurons et du surplus.

Pasteur ainsi que l'entends (Bis.)  
 Chante chansons en ce temps (Bis.)  
 C'est ce que l'Enfant desire

Ouyr chanter et bien dire :  
 Demenez tous passetemps  
 Je suys cy pour vous conduire  
 Demenez tous passetemps  
 Tous les cieulx en sont contens.  
 Car tant plus tant plus tant plus  
 Vous implorerez sa grace  
 Et tant plus tant plus tant plus  
 Grace aurez et du surplus.

Au lieu ou l'Enfant est nay (Bis)  
 Comme il estoit ordonné (Bis)  
 Les pasteurs soubdain allerent  
 En la creische le trouerent  
 Et apres auoir sonné  
 Reueremment l'adorerent  
 Et apres auoir sonné  
 Beaulx presens luy ont donné.  
 Dont tant plus tant plus tant plus  
 Vous implorerez sa grace  
 Et tant plus tant plus tant plus  
 Grace aurez et du surplus.

Je vous dy que cest Enfant (bis)  
 De mort sera triumpnant (Bis)  
 Or faisons luy donc priere

D'oraison pure et entiere  
Le priant deuotement  
Que soyons soubz sa banniere  
Le priant deuotement  
C'est lassus au firmament.  
Et tant plus tant plus tant plus  
Nous implorerons sa grace  
Et tant plus tant plus tant plus  
Grace aurons et du surplus.

AMEN.

## CHANSON DE NOEL

SUR

Dame scauriez vous congnoistre  
Las que puisse estre?  
Dame donnez a congnoistre  
Que ce peult estre.

Qvant les Peres ont congneu  
Et les Prophetes preueu  
Cest que depuis auons veu,  
L'Enfant qui de toy vient naistre :  
Las que peult ce estre?  
Dame donnez a congnoistre  
Que ce peult estre.

Moyse fut en regardant  
Ses brebis seul regardant      Exo. 3.  
Le buysson de feu ardent  
Et la Dieu se voulut mettre :  
Las que peult ce estre?  
Dame scauriez vous congnoistre  
Que ce peult estre.

D'une vierge fut yssant  
Vng bouton, et florissant  
A rendu un fruyct puissant    Num. 17.  
C'est la verge du grand prebstre :  
Las que peult ce estre ?  
    Dame donnez a congnoistre  
    Que ce peult estre.

Ce que les peres ont dit  
Et les Prophetes predit  
Auiourd'huy sans contredit  
Vient en toy, vierge, aparoistre :  
Las que peult ce estre ?  
    Dame donnez a congnoistre  
    Que ce peult estre.

Car en ta virginité  
Le second en Trinité  
Enfante en humanité  
Comme il a voulu permettre :  
Las que peult ce estre ?  
    Dame donnez a congnoistre  
    Que ce peult estre.

Doncques tu l'as enfanté

Les Anges en ont chanté  
Et nous ont admounesté  
La paix faicte en ce bas estre :  
Las que peult ce estre ?  
    Dame donnez a congnoistre  
    Que ce peult estre.

Pasteurs ont abandonné  
Leurs troupeaulx, et ont sonné  
Tant que l'aer a resonné,  
Et toute forest siluestre :  
Las que peult ce estre ?  
    Dame scauriez vous congnoistre  
    Que ce peult estre.

Avec eulx est arriué  
Le gras chapon gros creué  
Et tres bien si est trouué  
Il ne voulait que repaistre :  
Las que peult ce estre ?  
    Dame donnez a congnoistre  
    Que ce peult estre.

Les trois Roys l'ont adoré,  
Et sa grace ont imploré  
Et tous trois l'ont adoré

Comme leur seigneur et maistre :

Las que peult ce estre?

Dame donnez a congnoistre

Que ce peult estre.

Chascun face son debuoir

De contempler et scauoir

Ce qu'il nous faict assauoir

Quant noz pechez veult remettre :

Las que peult ce estre?

Dame donnez a congnoistre

Que ce peult estre.

AMEN.

# NOEL

SUR

Je porteroi les blanches patenostres.  
Comme bigotte.

**D**e franc vouloir nous chanterons de celle  
Entiere et belle  
En qui Jesus a prins humanité  
Et qui demeure en sa virginité  
Mere de Dieu tres humble iouuencelle  
Entiere et belle :

De tous les Cieulx le tresor est en elle  
Entiere et belle.  
C'est celle la en qui l'Eternité,  
C'est assauoir la sainte Trinité,  
S'est alliée en amour mutuelle  
Entiere et belle.

Ce diuin faict , c'est chose bien nouvelle  
Entiere et belle,  
Par maint Prophete auoit este dicté,

Ce que depuis a este recité  
Par Gabriel luy portant la nouvelle  
Entiere et belle :

Ave, luy dist, pas ne fault que le celle  
Entiere et belle,  
Le filz de Dieu s'en vient en verité  
Pour te donner nom de maternité  
Te faisant mere et nourrice et pucelle  
Entiere et belle.

Mere de Dieu ie te puis dire telle  
Entiere et belle :  
Dedans neuf moys tu auras enfanté  
Le seigneur Dieu et pucelle alaicté  
Humainement de ta propre mamelle  
Entiere et belle.

Or est le iour et feste solennelle,  
Entiere et belle,  
Le iour heureux de sa natiuité  
Ce iour nous met hors de captiuité,  
Et nous promet a tous vie eternelle  
Entiere et belle.

D'ou vient cela que l'Essence immortelle,

Entiere et belle  
Veult aujourd'huy prendre mortalité ?  
C'est pour porter de tous l'iniquité  
En vne croix mise sur son esselle  
Entiere et belle.

Prions les tous celle la qui precelle ,  
Entiere et belle  
Les saintz de Dieu en pleine infinité  
Qu'ayons la paix : puis la diuinité  
Auec son filz en la ioye eternelle  
Entiere et belle.

AMEN.

# NOEL

SUR

**Je suis grise voyement.**

**Chantons tous ie vous en prie  
En ce temps deuotieux  
Chantons vng chant glorieux  
Delaissons melencolye :  
Chantons.**

**Car la princesse des Cieulx  
Produyt L'Enfant precieux  
Le digne et saint fruyct de vie :  
Chantons.**

**Dessus l'Aspid venimeux  
Et Basilic maculeux  
Sa puissance embellye  
Chantons.**

**Le Dracon est souffreteux**

Le Lyon baisse les yeulx  
Par ceste Vierge Marie :  
Chantons.

Car ce iourd'huy tant heureux  
A produyt le Dieu des Dieux  
Ainsi le certifie :  
Chantons.

Anges en l'aer gracieux  
En leurs chantz armonieux  
Ont gringoté leur partie :  
Chantons.

Et les pasteurs curieux  
Veoir l'Enfant delicieux  
Sont sortis de la prarye :  
Chantons.

Je m'en allay avec eulx  
En menant de cueur ioyeux  
Ma Valentine iolye :  
Chantons.

Par œuure miraculeux  
Trois Roys sont de diuers lieux

Venez en cette partie :  
Chantons

Prions le Dieu vertueux  
Et misericordieux  
Qu'ayons sa gloire infinie.  
AMEN.

# NOEL

## SUR LE CHANT

Comière il m'y fault vng seruant  
Qui sache bien tout faire.

**B**ergere, esleuons nostre esprit  
En cest auant de Jesu Christ  
A chose salulaire,  
Bergere, Bergere, Bergere,  
A chose salulaire. Bergere.

Bergere, n'entendez vous pas  
Que le filz de Dieu vient en bas  
En ce val de misere? Bergere.

Bergere, c'est le saint Daulphin  
Qui met a noz pechez la fin  
Pour la faulte premiere. Bergere.

Bergere, la vierge a conceu  
Et a du saint Esprit receu  
Le filz aymé du pere. Bergere.

Bergere, et puis l'a enfanté  
Et de sa mamelle alaieté  
Vierge nourrice et mere. Bergere.

Bergere, par montz et par vaulx  
L'Ange denonce aux pastoureaux,  
Au ciel estre la gloire. Bergere.

Bergere, et puis nous a chanté  
Qu'a tous de bonne volonté  
La paix estoit planiere. Bergere.

Bergere, tous en vng monceau  
Vont veoir l'Enfant nay de nouveau  
Et aussi la commere. Bergere.

Bergere, Jaquette iouoit  
De sa viole, et si louoyt  
Ce tant diuin mystere. Bergere.

Bergere, voicy les trois Roys  
Auec le conte d'Alsinoy  
Qui porte la banniere. Bergere.

Bergere, tous ensemblement

Nous prirons tres humblement  
Luy qui est la lumiere, Bergere.

Que nous ayons de noz pechez  
Desquels nous sommes empeschez  
Remission entiere. Bergere.

AMEN.

# NOEL

SUR

Amy ie ne veulx plus aymer.

**L**e saint Esprit venu du pere  
Faict que Marie et vierge et mere  
Enfante sans corruption  
Jesus nostre redemption.

Nature prends resiouyssance  
Tu es ce iour hors de souffrance  
Car en toy prends subiection  
Jesus nostre Redemption.

Dauid en iouant de sa harpe  
Richement pendue en escharpe,  
En a fait quelque mention  
De Dieu nostre Redemption.

Les saintz Prophetes autenticques  
En ont fait Carmes et Cantiques,

Sachantz bien la permission  
De Dieu nostre Redemption.

Marie a receu la nouuelle  
Et sent le fruyct qui est en elle  
Par diuine obumbration,  
C'est Dieu nostre Redemption.

Marie a tousiours voulu taire  
Le faict de ce diuin mystere  
Touchant ceste incarnation  
De Dieu nostre redemption.

Vierge heureuse en ceste nuit clere  
Du monde la vraye lumiere  
As enfanté sans fraction  
Jesus nostre Redemption.

Tous les Cieulx en font resonance  
Les Anges chantent a plaisance  
En toute jubilation  
Car c'est nostre Redemption.

Les pasteurs en diligence,  
Faire luy vont obeissance  
Auecques humble affection ;

Car c'est nostre redemption.

Les trois Roys comme Dieu l'adorent ,  
Et comme Roy apres l'honnorent  
Tous trois d'estrange region ,  
Car c'est nostre Redemption.

Prions le d'oraison parfaicte ,  
Qu'en son saint Paradis nous mette ;  
C'est toute nostre intention ,  
Jesus nostre redemption.

AMEN.

Cy finissent les Noelz nouveaux com-  
posez par le CONTE D'ALSINOYS pour l'an  
mil cinq cens quarante-cinq.



# AUTRES NOELZ

SUR LES CHANTZ

CY APRES DECLAREZ.

NOELZ SUR :

Gabelleurs d'Ygrande.

Ce qui m'est deu et ordonne.

Nous irons nous tousiours coucher sans chandelle,  
sans lanterne.

C'est a la fin voy tu bien que ie l'ayme.

La vigile d'un dimanche.



## CHANT DE NOEL

SUR

Abbeurs d'Ygrande.

Chantons Noel puis que Dieu  
Le commande  
La nuict et le iour  
L'Emanuel est né que l'on demande:  
Chascun de nous y entende  
Par feruent amour.

Messieurs du Mans,  
Chascun luy face offrande  
La nuict et le iour  
Affin que honneur gloyre et los on luy rende :  
Chascun de nous y entende  
Par feruent amour.

De saint Julian  
Iront en belle bende  
La nuict et le iour  
Et luy feront reuerence tres grande :  
Chascun de nous y entende

Par feruent amour.

De saint Vincent  
Viendront sans qu'on les mande  
La nuict et le iour  
Portans boucquetz  
De laurier et lauende:  
Chascun de nous y entende  
Par feruent amour.

Saint Pierre ira  
Ou poyra grosse amende  
La nuict et le iour  
Et porteront a plains platz de viande:  
Chascun de nous y entende  
Par feruent amour.

De saint Paduin  
Bergere en houppelande  
La nuict et le iour  
Fera present de toille de Holande :  
Chascun de nous y entende  
Par feruent amour.

Les Gourdaynoys  
Sans que a eulx on descende

La nuict et le iour  
Apporteront eaulx sans qu'on les attende :  
Chascun de nous y entende  
Par feruent amour.

De saint Benoist  
Par grand troppe marchande  
La nuict et le iour  
Luy offriront de leurs cuirs une bende :  
Chascun de nous y entende  
Par feruent amour.

Ceux de saint Jehan  
En bende bien friande  
La nuict et le iour  
Porteront vin  
A pleins potz de Garlande :  
Chascun de nous y entende  
Par feruent amour.

Culturiens par faxon fort gallande  
La nuict et le iour  
N'auront aucuns biens que lors on n'estende :  
Chascun de nous y entende  
Par fervent amour.

Saint Nycolas ne fault que s'en deffende  
La nuict et le iour  
Mays portera la mauuiz et calende :  
Chascun de nous y entende  
Par feruent amour.

Les Pontlieuoyz chanteront pour la lande  
La nuict et le iour  
Si tres si fort que toute teste en fende :  
Chascun de nous y entende  
Par feruent amour.

Venez trestous que le gibbet s'en pende  
La nuict et le iour  
A l'aduenir et que chascun s'admende :  
Chascun de nous y entende  
Par feruent amour.

Prions l'Enfant  
Que a nous se condescende  
La nuict et le iour  
Et soyons mys  
Des saintz en la legende :  
Chascun de nous y entende  
Par feruent amour,

AMEN.

## CHANT DE NOEL

### SUR LA CHANSON

Ce qui m'est deu et ordonne  
Esse raison que ie le perde.

**L**euans noz cueurs au Dieu du ciel  
Manceaux, prenons esiouyssance  
Par l'aduent de l'Emmanuel  
Dont en auons la congnoissance,  
Aussi du lieu de sa naissance  
Et comme en la terre habita,  
Vainquit la mort par sa puissance (bis)  
Et le tiers iour ressusista.

Ceste sainte natiuité  
Les Anges du ciel annoncerent  
Aux pastoureaux de la cité  
Qui promptement tous y allerent,  
Es herbaiges brebis laisserent,  
Moutons, cheurettes et aigneaux  
Et ensemble tous l'adorerent (bis)

En luy offrant de beaulx ioyaulx.

Les elemens ont tout congneu  
Ceste sainte et digne naissance,  
Le firmament en fut esmeu,  
La terre par grand desmonstrance  
Produict fleur et fruict de plaisance,  
La mer fut calme , et ses ruisseaux,  
Les bestes qui n'ont souuenance (bis)  
Le congneurent et les oyseaux.

De Dieu il fut preordonné  
Deuant le ciel la terre monde,  
Et a la fin a nous donné  
Pour punir le peché immonde;  
Luy qui estoit nect pur et monde  
Comme Dieu son pere immortel,  
Par grace que de luy redonde, (bis)  
Pour nous s'est faict homme mortel.

Manceaulx, deuotz soyons records,  
Par charité vers nous espresse,  
Comme nous a baillé son corps  
Et baille encor soubz ceste espece  
De pain; car la foy nous compresse  
Croyre que luy qui tout contient

Contenu y est et sans presse (bis)  
Comme sainte Eglise le tient.

Prions Jesus deuotement  
Et sa digne mere de grace  
Qu'a la mort et au iugement  
De noz pechez pardon nous face  
Et notamment tous les efface  
Tant que purgez soyons et sains  
Et dignes de le veoir en face (bis)  
En Paradis avec les saints.

AMEN.

## NOEL

### SUR LE CHANT

**Nous irons nous tousiours coucher sans  
chandelle, sans lanterne, etc.**

**N**ous deburions      Noel chanter  
Chansonnette      Nouuellette  
A gringuelot de pucellette  
Nous deburions Noel chanter  
Tout cest Aduent apres souper.

Gabriel fut le messaiger  
Dont nous debuons Noel chanter  
Du ciel transmays pour annoncer  
Chansonnette      Qui nous haicte  
A Marie vierge pucelette  
Qu'en son ventre debuoit porter  
Le filz Dieu pour nous rachapter.  
Nous deburions      Noel chanter etc.

Quant Marie voulut enfanter  
Dont nous debuons Noel chanter

Logis ne purent onc trouuer  
 En tauerne            Et liuerne  
 Soufflant du cousté de galerne  
 La contraignit s'aller coucher  
 En vne estable sans souper.  
 Nous deburions    Noel chanter etc.

A minuict sans peine endurer  
 Dont nous debuons Noel chanter  
 Vierge product son Enfant cher  
 Sans chandelle        Sans lanterne  
 Sans auoir nul qui la gouerne  
 Fors que Ioseph qui mist coucher  
 En la craiche son Enfant cher.  
 Nous deburions    Noel chanter etc.

Gabriel le vint annoncer  
 Dont nous debuons Noel chanter  
 Aux pasteurs qui n'estoient couchez  
 Faisant vueille        Sus l'oueille  
 Qui soubdain ont leué l'oreille  
 Laisant les moutons a garder  
 Ils sont acouruz sans tarder.  
 Nous deburions    Noel chanter etc.

Chascun deuoit feist d'y porter

Dont nous debuons Noel chanter  
 Pour la mere reconforter  
 Des galettes      Tartelettes  
 Noyz, poyres, pommes et noysettes  
 Bon vin plain baril et picher  
 Que Ioseph tenoit le plus cher.  
 Nous deburions      Noel chanter etc.

Troys Roys d'un pays bien etranger  
 Dont nous debuons Noel chanter  
 En Bethleem se sont rengez  
 De bon zelle      Sans querelle  
 D'or, Myrrhe, Encens a kyrielle  
 Presenterent et du plus cher  
 Au Roy des Roys filz de Dieu cher.  
 Nous deburions      Noel chanter etc.

Les bons pasteurs conuient chanter  
 Dont nous debuons Noel chanter  
 Et les Roys sans nous exempter  
 De bien faire      Et retraire  
 Lutheriens qui veullent braire  
 Et soubz la cheminée prescher  
 Contre le vray que tenons cher.  
 Nous deburions      Noel chanter etc.

Nous prirons mere et Enfant cher  
Dont nous debuons Noel chanter  
Que puissions tant faire et chanter  
En ce monde Viel immonde  
Ou peril et danger abonde  
Que puissions lassus sans cesser  
En Paradis Noel chanter.

Nous deburions Noel chanter  
Chansonnette Nouuellette  
A gringuelot de pucellette  
Nous deburions Noel chanter  
Tout cest Aduent apres souper.

AMEN.

# NOEL

## SUR LE CHANT

C'est a la fin voy tu bien que l'ayme  
Chantons a fin de Noel qu'il nous aime  
Il nous ayme bien si l'aymons bien et de cueur fin.

Vienca Robin t'en dors tu la? (bis)  
J'escoute ce Rossignol la  
Jen chante la  
Oncques n'ouy  
Si iolys par mon ame :  
C'est vng trihory  
De gorgery Et du plus fin,  
Chantons a fin de Noel qu'il nous ayme  
Il nous ayme bien sil l'aymons bien et de cueur fin.

Entens tu bien ce qu'il dict la (bis)  
C'est gringuelot de menu fa  
Escoute va C'est Gabriel  
Du hault ciel

C'est vng Ange  
C'est de Paradis  
Lassus assis Vng seraphin.  
Chantons a fin etc.

Esbahys suys de ce chant la (bis)  
Onc trompette mieulx ne sonna  
Ne resonna  
Escoutons bien  
S'il dict rien  
Qu'il nous serue  
Pour garder brebis  
Et nos amis De ce lutin.  
Chantons a fin etc.

Il parle du vray Messias (bis)  
Qu'on dict de prophetes vng tas :  
Ne faict il pas ? Il la chante  
Qu'il est né  
D'une vierge  
Et gist sans berceau  
Deuant vng veau  
Jusques au matin.  
Chantons a fin etc.

Onc n'ouy si merueilleux cas (bis)

Allons y veoir : ne m'en croy pas  
Ne viens tu pas?      Courons le trot  
Prends Margot  
Et Perrette  
Portons ce qu'il fault  
Et froid et chault  
Pour vng festin.  
Chantons a fin etc.

Thenot est cheut vng si grand sault  
Dedens ce grenoillis la hault  
Que sans Jacquault      Qui l'a retiré  
Detiré                      Par l'oreille  
Il eust grenouillé  
Et patrouillé  
Jusque au matin.  
Chantons a fin etc.

O vierge ne t'esbahis pas      (bis)  
De veoir des bergers si grand tas  
Joye et soulas :      Te presentons  
Et donnons  
Pour estraine  
Chascun vng present  
Petit et gent  
Et de cueur fin.

Chantons a fin etc.

L'Enfant petit n'oublions pas (bis)  
D'affiches il aura tas  
Pour ses esbatz : Vng flageollet  
Vng iouet a sonnettes  
Vne sainturotte  
Bauerotte Et vng beguyn.  
Chantons a fin etc.

Prenez en gré nos petits dons (bis)  
Congie d'aller a noz moutons  
Nous demandons  
O mere et filz  
Noz brebiz  
Chair et laine  
Garde des larrons  
Et des griffons Et des lutins.  
Chantons etc.

Peuple Manczoys n'oubliez pas (bis)  
D'aller prier hault et bas  
Sans nulz desbatz  
A cest Noel de bon vueil  
Filz et mere  
Qu'ayons Paradis

Et noz amys            A nostre fin  
Chantons afin de Noel qu'il nous ayme  
Il nous ayme bien sil l'aymons bien et de cuer fin.  
AMEN.

## NOEL

SUR LA VIGILE D'UN DIMANCHE.

**M**anceaulx, prenons Esperance  
Qu'un iour serons tous amys,  
Plus n'aurons dueil ne souffrance  
Malgré tous noz ennemys :  
Dieu nous mis  
A pleine deliurance  
Chantons Noel a sa naissance.

En Bethleem sans doubtance  
Jesus print natiuité,  
Fuyant d'orgueil l'accointance  
Humblement s'est inuité :  
Humilité (bis)  
Donne bien a congnoistre  
Quant sur du feing il voulut naistre.

Aux pasteurs de vigilance  
Pauures viuans simplement  
Gabriel en diligence

Annunza premierement  
L'aduenement (bis)  
De Jesus vray prophete,  
Chantant que la paix estoit faicte.

Promptement d'une aliance  
Partirent ioyusement,  
Trounerent sans defaillance  
L'Enfant nay certainement;  
Deutement (bis)  
De bon cueur l'adorerent,  
Puis a leurs moutons retournerent.

Après les Roys de prudence  
A le veoir furent presens  
Et misrent en euidence  
Deuant luy troys beaulx presens,  
Or, Myrrhe, Encens : (bis)  
L'estoille delectable  
Les conduysit iusque a l'estable.

Herodes remply d'enuye  
Dist et manda par escript  
Oster aux enfans la vie  
Cuidant occir Jesu Christ  
Et contraignit (bis)

L'Enfant laisser son giste  
Et de la fuyr iusque en Egipte.

Prions diuine puissance  
Le Roy des Roys immortel  
Nous preseruer de nuyssance  
Et de l'ennemy mortel.

AMEN : Noel : (bis)  
Jesu Christ par sa grace  
De noz pechez pardon nous face.  
AMEN.

Cy finissent les Noelz nouueaux : Et furent acheuez de reimprimer au Mans par Lanier imprimeur iuré le x<sup>e</sup> iour du mois d'octobre l'an mil huyt cens quarante et sept.

